

摘藻堂四庫全書薈要

集部

欽定四庫全書薈要

聖祖仁皇帝御製文集卷六目錄

勅諭

諭吏兵二部

諭禮部

諭吏戶兵三部

諭禮部

諭管侍衛內大臣

諭海澄公黃芳世

諭日講官起居注侍讀學士牛鈕

諭禮部

諭翰林院掌院學士喇沙里陳廷敬侍讀學士

葉方藹侍講學士張英

諭刑部

諭新委西勒圖部落首領喇嘛墨爾根噶布褚

諭平南親王奄達尚之信齋奏叅將羅思漢

諭遣往將軍莽吉圖軍前侍講學士顧八代
諭平南親王奄達尚之信齋奏回粵張永祥

諭禮部

諭吏禮二部

諭吏部

諭大學士明珠

諭大學士巴泰

諭廣東提督王可臣

諭大學士索額圖

諭吏部等大小各衙門

諭河南巡撫董國興

諭遣往廣西巡撫傅宏烈軍前筆帖式噶爾西
拖洛

諭大學士署禮部索額圖

諭工部尚書馬喇侍郎溫代

欽定四庫全書薈要卷一萬二千九百八十八集部

聖祖仁皇帝御製文集卷六

勅諭

諭吏兵二部

撫遠大將軍都統大學士圖海器識老成才猷練達贊
襄機務宣力累朝以文武之長才兼忠愛之至性勞績
茂著倚毗良殷前察哈爾布爾尼背恩反叛命圖海為
副將軍統兵征剿運籌決勝克振軍威未及一月捷功

立奏逆賊殲滅疆圉救寧近以平涼等處阻兵日久屢
命剿撫罔有成效特簡圖海為大將軍總統大兵節制
各路果爾謀略淵深調度得宜軍鋒所至一戰克捷更
能體朕好生之心宣布恩威開誠招撫遂使平涼慶陽
固原等處文武官員兵民人等傾心向化悔罪歸誠生
民免於塗炭地方得以安全數日之間關隴悉皆底定
皆由籌畫周詳布置神速剿撫竝用克建膚功圖海以
心膂大臣膺秉鉞重寄實心為國克副倚任朕心深為

嘉悅於軍功議敘外應從優加恩以示朕眷注忠勤酬
答勲庸至意著議政王貝勒大臣會同議奏特諭康熙
十五年八月二十日

諭禮部

帝王克謹

天戒凡有垂象皆關治理故設立專官職司占候所係
甚重一切祥異理應詳加推測不時具奏今欽天監衙
門止於尋常節氣尚有觀驗至今歲三月初間霜霧及

以前星辰凌犯等項應行占奏者竝未奏聞皆由該監
官員蒙昧疎忽有負職掌爾部即行察議具奏以後欽
天監所奏占候本章內閣照例票擬批發特諭康熙十
六年三月十三日

諭吏戶兵三部

自逆賊吳三桂煽亂以來各用兵地方文武官員或矢
志固守勢窮莫支盡節封疆或身陷賊中堅貞不屈橫
被慘害或從容就義全家殉難視死如歸此皆為國捐

軀克全忠節深為可憫其有骸骨未能歸葬妻子尚寄
遠方孤苦無依更堪軫惻宜加恩卹以慰忠魂著各該
督撫察明凡殉難文武大小官員骸骨妻子俱准動正
項錢糧資送歸里以昭朕優恤忠節至意特諭康熙十
六年三月二十七日

諭禮部

朕恭奉

聖祖母太皇太后慈諭冊立妃公遏必隆之女為皇后

爾部即選擇吉期開具儀注來奏特諭康熙十六年五月十一日

諭管侍衛內大臣

海澄公黃芳世舉家殉節被慘至極芳世坐次曾入內大臣班中已後凡有恩賞皆與內大臣一體頒賜坐次仍在舊例伊或有奏事并請安人來俱照外省漢藩等例著內班侍衛代為陳奏康熙十六年五月十六日

諭海澄公黃芳世

卿父子功烈素著復全家殉難每念及此朕心罔不傷
悼况卿由粵東進剿忽遭廣省兵變孤身涉險而出可
見忠貞不貳顛沛不改其守今仍襲海澄公鎮守福建
水師提督總兵官卿愈加訓練鼓舞將士以靖海氛使
地方秋毫無犯百姓安堵方為不負封疆重寄特諭康
熙十六年五月十八日

諭日講官起居注侍讀學士牛鈕

爾考中進士正宜黽勉學問之時抑且年富力强自當

大有進益誦讀之功固不可廢躬行實踐尤為至要務
時勤職業也康熙十六年五月二十日

諭禮部

朕恭奉

聖祖母太皇太后慈諭稽古帝王宮闈之制必備妃嬪
以襄內政冊封佟氏為貴妃李氏為安嬪王佳氏為敬
嬪董氏為端嬪馬佳氏為榮嬪納喇氏為惠嬪郭羅洛
氏為宜嬪黑舍里氏為僖嬪爾部即選擇吉期開列儀

注具奏特諭康熙十六年五月二十四日

諭翰林院掌院學士喇沙里陳廷敬侍讀學士葉方藹侍講學士張英

卿等進講啓導一一悉備皆內聖外王修齊治平之道朕雖不敏罔不孜孜詢之每講之時必專意以聽但學問無窮不在徒言要惟當躬行實踐方有益於所學卿等仍愈加直言毋有隱諱以助朕好學進修之意康熙十六年五月二十八日

諭刑部

邇者農事方殷天氣亢旱朕念切民依夙夜憂惕或刑獄淹禁中有冤抑致干

天和亦未可知茲特遣巴泰明珠孔國岱項景襄會同三法司將已結重案逐一詳加審理凡有罪可矜疑者即與察明事由開列具奏務使情法允協有枉必申以副朕省刑恤民至意特諭康熙十六年六月初二日
諭新委西勒圖部落首領喇嘛墨爾根噶布褚

此廟係

太宗皇帝建立令滿習禮胡圖克突喇嘛居住嗣令諾門汗喇嘛居住嗣令爾叔西勒圖綽爾濟喇嘛居住後因徒衆揭告革退屢經更換喇嘛管理俱貪蒙古市利止以蓄養蕃滋家計殷厚為念求其能明梵教之理勉力課誦者甚少積習漸深至蒙古額木齊之輩學騎射鎗法當察哈爾叛時依附惡黨同抗大兵後叛逆盡除仍念爾叔西勒圖綽爾濟原係大喇嘛可以約束復令

管理今已物故以爾為滿習禮胡圖克突之親選委管
理部落爾到彼即將喇嘛陋習盡行釐革務遵本業克
守清規絕去欺妄梵教佛法咸宜闡明若踵行前弊則
上負

太宗皇帝建刹之意下實有愧於諸名喇嘛也欽哉康
熙十六年六月十四日

諭平南親王奄達尚之信齋奏參將羅思漢

爾王素懷忠藎思報効國家朕已知之舉廣東全省歸

誠民免湯火之患深為可嘉據今時勢剿滅吳三桂甚為緊要大兵進取務貴神速吳逆近在湘潭其意蓋以大兵必從衡永廣東進攻故據此為備今廣西若能反正爾王即宜率兵三路進剿滿洲大兵亦令各路並發前此吳三桂率領偽將軍十八人賊兵十萬屯聚長沙挑濠立樁僅可支持旦夕若大兵數路並進吳逆斷無如許偽將賊兵隨處備設濠樁以與大兵相抗其滅亡可翹足而待矣爾到彼即傳朕諭康熙十六年六月十

四日

諭遣往將軍莽吉圖軍前侍講學士顧八代

將軍莽吉圖於指授之處克奏成功深為可嘉宜益加
勉勵以副朕委任之意用兵之道以神速為上從前稽
遲以致岳州漳州廣東全省未收捷效伊所親見此後
凡有徵調俱宜剋期迅發爾顧八代以內閣職掌前往
檔案冊籍須逐一詳明無預外事以盡乃職康熙十六
年六月二十七日

諭平南親王奄達尚之信齋奏回粵張永祥

近來逆賊俱偏在廣西一邊奄達宜親率將士進剿以圖功效爾張永祥既授總兵官俟有專汛應勉勵職守安戢兵民整飭地方剿除賊寇可也康熙十六年七月十三日

諭禮部

世祖章皇帝乳母朴氏保育

先皇克昭敬慎朕躬幼時殫心調護夙夜慇懃撫視周

詳情實等於顧復提攜備至時罔怠於寒暄襁抱曲體
乎性情勤劬彌切於啼笑恭謹抒匪懈之忱淑惠盡慈
愛之義每懷疇昔時厯於衷封典宜加用彰隆眷今封
為奉聖夫人頂帽服色照公夫人品級爾部即遵諭行
特諭康熙十六年七月二十五日

諭吏禮二部

自古帝王統御寰區首在敦崇孝治既已追尊母后揚
圻慈徽尤必推恩外戚優加封爵展孝思於靡盡昭發

祥之有源甚盛典也緬維

慈和皇太后奉事

太皇太后克盡誠孝佐助

皇考夙著敬勤誕育朕躬纘承鴻業每懷顧復深慈不
勝本源永慕恩推所自允符彝章原任都統精奇尼哈
番佟圖賴

慈和皇太后之父也勲舊世裔宣力累朝厚德鍾祥篤
生

聖母念劬勞之罔報宜恩禮之隆施特晉崇階以昭典
制佟圖賴著將精奇尼哈番加封為一等公妻焦氏封
為公夫人給與誥命世襲罔替爾部即遵諭行特諭康
熙十六年七月二十五日

諭吏部

內閣機密重地事務殷繁需人贊理尚書勒德洪明珠
著補授內閣大學士應兼職銜著議奏爾部即遵諭行
特諭康熙十六年七月二十九日

諭大學士明珠

卿才能素著久任股肱特簡絲綸重地贊理機務因卿
夙稽典史曉鬯古今責難陳善之理文獻通考等書皆
致君澤民至道所係特以賜卿退食之暇可時觀閱以
副朕虛懷求治之意特諭康熙十六年八月初一日

諭大學士巴泰

卿以年邁請休情詞懇切准以原官致仕以遂其志念
卿効力有年清端勤慎今將所御衣冠帶靴特賜與卿

用旌老臣以昭朕始終眷戀至意特諭康熙十六年八月十四日

諭廣東提督王可臣

卿久任巖疆聲名素著故特簡禁近茲因廣東要地授為提督爾至地方撫戢兵民剿滅賊寇奠安疆圉以副朕委任之意康熙十六年八月十五日

諭大學士索額圖

卿首膺機密之重素著輔弼之猷讜言屢進每得其效

竭力無餘恒見其勞誠為股肱心膂兼之蘊蓄淵深博聞廣見想翰墨餘事博物品類必了然心目朕於萬幾之暇貯有試筆墨字五幅珍玩玉器二具特賜與卿瞻觀之時卽知隆眷之意特諭康熙十六年八月十八日諭吏部等大小各衙門

向來各衙門事件關係重大者雖有定限赴科道稽察但事有易結者卽宜速結必俟限滿方行題覆多致壅滯更有各項呈狀不係註銷者任意耽延借端拘提人

犯數月不為審結無辜牽累殊堪憫惻以後題覆本章
俱著速行料理不必盡拘定限至於審理事件亦速為
完結著照註銷欽件例定限每月造冊赴都察院科道
稽察具奏爾等各宜力圖振作體恤民隱以副朕孜孜
求治之意特諭康熙十六年八月二十三日

諭河南巡撫董國興

爾前任巡撫雖無善狀未有過端因病求罷遂爾解任
今復簡爾巡撫河南宜以愛民為要徵收賦稅慎勿煩

擾百姓委曲勸輸以資兵餉務期竭盡心力以副特用之意康熙十六年九月初二日

諭遣往廣西巡撫傅宏烈軍前筆帖式噶爾西拖洛

傅宏烈自歸正以來盡力報効綏定地方朕深嘉焉傳諭知之爾等亦宜殫心勉勵凡伊所司檔案之外他事無得干預康熙十六年九月初八日

諭大學士署禮部索額圖

所賜外藩蒙古廩食數原充足所飼馬匹亦皆肥壯粟肉草豆未曾核減近聞供給不足馬匹瘦羸此皆司事并看餵馬匹人員作弊侵剋所致此後著禮部堂官親


察

康熙十六年九月初九日

諭工部尚書馬喇侍郎溫代

爾等俱係特簡工部近見工部事務弊端甚多各宜勉盡乃職釐剔積弊以副朕委任之意康熙十六年十一月初二日

聖祖仁皇帝御製文集卷六



總校官庶吉士臣侍朝

校對官檢討臣王福清

膳錄貢生臣于飛熊

膳錄監生臣單勉中

欽定四庫全書薈要

集部

聖祖仁皇帝御製文集卷

七至九

詳校官原任編修臣徐立綱

欽定四庫全書薈要

聖祖仁皇帝御製文集卷七目錄

勅諭

諭巴林長公主

諭傅宏烈賫奏道臣劉曉

諭內閣傳諭平南親王奄達尚之信賫奏人

諭吏部

諭將軍穆占



諭戶部

諭禮部

諭吏戶兵三部

諭撫蠻滅寇將軍廣西巡撫傅宏烈

諭吏兵二部

諭掌院學士陳廷敬侍講學士張英侍讀王士

禎中書舍人高士奇

諭對秦吳默納等

諭大學士撫遠大將軍圖海

諭吏部等衙門

諭兵部

諭中書舍人高士奇

諭刑部

諭禮部

諭吏部等衙門

諭將軍穆占

欽定四庫全書薈要卷一萬二千九百八十九

集部

聖祖仁皇帝御製文集卷七

勅諭

諭巴林長公主

淑慧長公主體中安否公主孝敬性成諸事無不周詳
即至微之物皆極精美每年各種油凝乳餅并羊腊等
件進奉

太皇太后及朕者尤極誠恪故

太皇太后聖祖母時增七箸朕亦為之加餐念姑常從
遠處齎送思特製衣相寄未有式樣因將薩哈爾察貂
皮外褂貂獬袍并鈕扣又製帽黑狐皮一張文綺內緞
表裏各十端付之來使若不以輕微可製衣服之天氣嚴
寒遣人未便故詳布朕意附札以往康熙十六年十一
月二十五日

諭傅宏烈賫奏道臣劉曉

將軍傅宏烈為國忘家黽勉効力所奏諸事俱係當今

急務區畫周詳朕甚嘉納爾歸傳與傳宏烈此後益當
整頓師旅速滅賊寇以副朕出民湯火至意康熙十七
年正月十一日

諭內閣傳諭平南親王奄達尚之信賫奏人

昔爾老王在時果品細物無不誠潔二年以來粵東事
變道路阻塞信使不通念及爾老王素日忠貞不貳為
國忘家罔不憫傷今王能承先志恢復粵東使人遠來
請安兼進橙子可嘉但用兵之秋非比無事之時況見

此物不勝思念爾老王王當安戢地方恢復粵西湖南
以全爾老王未盡之意朕心甚為期望此等細務勞人
費事勿復為念已後暫止康熙十七年正月十二日

諭吏部

自古一代之興必有博學鴻儒振起文運闡發經史潤
色詞章以備顧問著作之選朕萬幾時暇遊心文翰思
得博洽之士用資典學我朝定鼎以來崇儒重道培養
人材四海之廣豈無奇才碩彥學問淵通文藻瑰麗可

以追踪前詒者凡有學行兼優文詞卓越之人不論已
未出仕者在京三品以上及科道官員在外督撫布按
各舉所知朕將親試錄用其餘內外各官果有真知灼
見在內開送吏部在外開報於該督撫代為題薦務令
虛公延訪期得真才以副朕求賢右文之意爾部即通
行傳諭遵行特諭康熙十七年正月二十三日

諭將軍穆占

爾所密奏事宜朕已悉知前議政王大臣所議因無接

濟之兵令爾前進今賊將韓大任窮蹙來歸諸處俱已
尅復江西全省將士皆有餘暇故著簡親王與爾會同
酌議移文想尚未至爾是以先為陳奏耳在廷所議乃
合諸路情形統籌全局覽爾將軍等所奏各執已見者
甚衆此皆無濟於事嗣後須當同心勉力無負委任將
軍身體如何彼處諸將士佳否原奏發回特諭康熙十
七年二月初四日

諭戶部

錢糧關係國家大計年來各處兵馬需用糧餉最為浩繁在外總督巡撫及經管錢糧各官俱宜潔已奉公殫心料理一應支放開銷務須嚴加稽核詳慎節省方於軍國有裨近見各處奏銷或製備物料並不先行題明藉口軍機緊急濫請銷算或不行察核重複支給又不為扣抵或朦混重領希圖利已致滋糜費以及侵欺浮冒種種弊端難以枚舉以後應作何嚴行禁飭處分爾部會同吏兵工三部詳議定例具奏特諭康熙十七年

二月初九日

諭禮部

皇后鈕祜盧氏端懿夙著作配朕躬奉事

太皇太后

皇太后恪恭婉順殫竭孝忱正位宮闈節儉寬仁克襄
內治芳型伊始淑德彌彰茲於康熙十七年二月二十
六日崩逝追念壺儀良深痛悼宜有稱謚以垂永久著
內閣翰林院會同擬奏其應行典禮爾部詳察速議具

奏特諭康熙十七年三月初二日

諭吏戶兵三部

朕統御寰區孜孜圖治期於朝野安恬民生樂業共享昇平乃副朕宵旰勵精之願不意逆賊吳三桂背恩煽亂各處用兵禁旅征勦供應浩繁念及百姓困苦不忍加派科斂因允諸臣節次條奏如裁減驛站官俸工食及存留各項錢糧改折漕白二糧顏料各物增添鹽課鹽丁房田稅契牙行雜稅宦戶田地錢糧奏銷浮冒隱

漏地畝嚴行定例處分用過軍需未經報部不准銷算
以上新定各例不無過嚴但為籌畫軍需早滅逆賊以
安百姓之故事平之日自有裁酌各省督撫提鎮大小
文武等官俱宜上體朕意下念民生潔已奉公愛惜物
力務期早奏蕩平與民休息以稱朕乂安海宇至意爾
三部即通行傳諭遵行特諭康熙十七年三月十二日
諭撫蠻滅寇將軍廣西巡撫傅宏烈

覽卿所奏安人心固內地勦賊之策一一悉備疏內頒

旨及部議不甚如意又一時更換撫院藩司心甚疑畏
暫允其請俟廣西平定再為更易未為遲也等語以後
朕自有裁酌疏內河南綠旗兵三千北邊綠旗馬兵一
千福建藤牌手一千或江西贛州鎮標挑兵一千著前
營遊擊管天祥帶領迅赴臣營臣得此添兵五千便可
獨力前征等語但調北邊綠旗官兵途路遙遠不能無
慮近省綠旗官兵但有可調務允所奏疏內用其弟帶
領官兵來守梧州等語此人離粵日久難以復回又恐

其兄有疑心也密陳之疏畱中其廣東布政司一事高
州官兵一事滿洲大兵一事已有密旨著部議卿爾
忘家勲猷夙著恢復潯梧斬賊巨魁屢屢有功因賊負
固踞險一時不能即效卿愈加勤力勦撫粵西掃蕩逆
氛以副朕倚任至意特諭康熙十七年三月十六日

諭吏兵二部

向以閩省海疆要地雖經恢復海逆未平民生凋敝撫
綏防禦全藉文武大吏殫心料理方於兵民有裨今總

督郎廷相提督段應舉自簡任以來為時已久山谷之
伏莽未靖閭閻之困苦未蘇吏治未見澄清營伍漫無
整頓寇警頻聞地方騷擾更有甚者海賊侵犯內地事
前不能防禦事後不能堵剿皆由該督提庸劣無才職
業不修殊負簡任之意豈可仍令在任貽誤封疆著大
將軍康親王叅贊大臣靖南王及鎮平將軍會同嚴加
確議密行具奏爾二部即遵諭行特諭康熙十七年三
月二十四日

諭掌院學士陳廷敬侍講學士張英侍讀王士禎
中書舍人高士奇

朕召卿等編輯適五臺山貢至天花鮮馨罕有可稱佳
味特賜卿等使知名山風土也康熙十七年閏三月二
十一日

諭對秦吳默納等

爾等聞有皇后事欲於告祭長白山事畢將所委諸務
暫停來京固是但來已無及且烏喇等處未可頻行遣

使可將大小事宜逐一料理完結從容歸來朕於二三
月間體稍違和今已安善爾等佳否康熙十七年閏三
月二十五日

諭大學士撫遠大將軍圖海

卿向在機密重任澡德浴身志節高潔奉命西征早靖
巨寇宣布德意兵過之地秋毫無犯舊德老成可謂社
稷之臣前者拉都戶來知卿平安朕心良足慰也今因
拉都戶復回汛地故示朕意特諭康熙十七年四月初

五日

諭吏部等衙門

國家設法定例原期章程盡善垂之久遠上裨軍國下益民生必藉內外臣工精白乃心恪恭詳慎實心奉行方克永遵而無弊近見各處章奏凡於現行之例或借端營私巧為掩飾或推諉卸過冀免處分或徇庇情面曲為彌縫凡行一事每滋弊端以致良法美意澤未下究而累已及民揆諸立法初意殊為未符此等情弊科

道官雖有風聞因無確據難於指叅朕雖洞悉緣由期其自行改悔不加深求遂爾因循以為僥倖之路以後在內部院等衙門在外督撫各官俱著滌慮洗心痛改積習於有益國家民生事務籌畫擔當不避嫌怨務期法行無弊恩被閭閻以副朕立法定制愛養斯民至意如視為故事仍蹈前轍事經發覺定行嚴加處分決不饒恕著通行申飭遵行特諭康熙十七年四月二十三日

諭兵部

提督九門步軍統領費揚古自任事以來夙夜勤勞殫心料理緝獲盜賊搜捕奸宄使里巷寧謐輦轂肅清向來効力有年今尤克稱厥職應行議敘以示鼓勵作何加恩著議奏特諭康熙十七年四月二十七日

諭中書舍人高士奇

爾在內辦事有年凡密諭及朕所覽講章詩文等件纂輯書寫甚多實為可嘉特賜表裏十匹銀百兩以旌爾

之勤勞特諭康熙十七年五月初十日

諭刑部

刑獄重地人命攸關天氣炎熱亟宜清理雖熱審定例
每歲舉行但已結大案見在監禁者其中各犯或有無
知而罹法網小過而陷重辟株連無辜淹禁日久朕心
每思及此深為惻然茲特遣索額圖勒德洪杜立德屯
泰等會同三法司逐一詳加審理凡有罪可矜疑者即
與察明事由開列具奏務使情法允協有枉必申以副

朕欽恤刑獄至意特諭康熙十七年五月十三日

諭禮部

朕惟天人感召理有固然人事失於下則天變應於上
捷如影響豈曰罔稽今時值盛夏天氣亢暘雨澤維艱
炎暑特甚禾苗枯槁農事堪憂朕用是夙夜靡寧力圖
修省躬親齋戒虔禱甘霖務期精誠上達感格

天心爾部即察例擇期具儀來奏特諭康熙十七年六
月十三日

諭吏部等衙門

時當盛夏亢暘不雨酷暑經旬蘊隆未解又於是月十二日有青氣竟天之異因朕涼德布政不均罔克昭事上帝協敘陰陽

上天垂戒良有其由朕夙夜徬徨循省思咎茲已躬親齋戒虔行祈禱因念國家立綱陳紀分職宣猷政務繁多易滋闕失或用人未當賢否混淆以致庶績未熙事多叢脞內而部院總天下之樞機或條例有未盡善外

而督撫繫生民之休戚或吏治有未澄清以致朝廷德意不能下究軍民疾苦無由上聞召茲災眚譴告良殷凡今有應行應革事宜關係政治得失者著在京三品以上堂上官及言路諸臣各抒所見切實直陳朕將採擇施行用以上迓

天和綏乂蒸庶勿得浮泛塞責負朕求言圖治至意特諭康熙十七年六月十三日

諭將軍穆占

爾等近來行兵致有大臣陣亡聞之不勝傷悼兼之兩
將軍彼此推諉以非已汎為辭恐於事機有誤深為憂
之爾等爭執雖屬細事但爾前此欲將簡親王兵與爾
相繼前進止畱將軍和善額駙希福鎮守陳請前來朕
未之允蓋以江西地方所關甚巨且無接續之兵此將
軍等所悉知務令江西不生事變兩將軍商確萬全保
其無虞屢有諭旨何至尚厯朕懷今簡親王畱鎮在彼
尚有此事爾復藉口非已汎地倘如所請遣簡親王繼

爾進兵今此賊衆又將何兵禦之滿兵之勢貴聚聚則處處攻戰始克有利若無用空城使滿兵分駐以寡力而遇賊輕戰有志氣者盡歿行陣無賴之徒俱行敗北如此則實為可惜滿兵關係極為重大利戰則戰利守則守宜合全力以破賊衆若將所復賊棄之空城固執分守似乎不可今福建廣東情形亦不甚安爾等益當同心協意保固地方特此密諭康熙十七年七月初二日

聖祖仁皇帝御製文集卷七

欽定四庫全書薈要

聖祖仁皇帝御製文集卷八目錄

勅諭

諭大將軍康親王傑淑

諭安親王岳樂

因岳州將軍等失機特諭議政諸臣

諭禮部

諭吏部

諭盛京將軍安褚護

諭戶部

諭內務府

諭吏部

諭兵部

諭禮部

諭禮部

諭吏部

諭刑部

諭禮部

諭兵部

諭兵部

諭戶部

諭吏部等衙門

諭戶工二部

欽定四庫全書薈要卷一萬二千九百九十

集部

聖祖仁皇帝御製文集卷八

勅諭

諭大將軍康親王傑淑

近聞海澄被陷大臣提督俱各自盡殊為憫惻前以初至兵力即當削平山海諸寇因爾等輕視賊衆止知休養士卒有失遠謀以至於此今勢不可緩緩則賊可据守地方積蓄糧草固其濠壘所關非細或有匪類乘此蠢動亦未

可定王其悉心籌度謀出萬全速滅賊氛慰朕懸切行間
諸事王應統為陳奏特此密諭康熙十七年七月初二日
諭安親王岳樂

王肺腑至親久駐炎疆因長沙地勢卑濕朕每多懸念
來使抵京奏王平安朕心良足慰也今牙圖復回長沙
故示朕意特諭康熙十七年七月二十六日

因岳州將軍等失機特諭議政諸臣

據今時勢最緊要者全在岳州此不可不速取也近雖

少有失利然民為賊所迫尚有嚮往朝廷之心朕欲親率滿洲綠旗大兵聲明肆討儻失此機會則滿兵不服水土致挫鋒銳愈難收拾凡在軍前將軍皆謂破賊無期委靡如此即有志者恐亦掣肘不能行矣會議者國家謀猷所賴卿等有速滅巨憝救民水火之策亦宜預為商確著詳議以聞康熙十七年八月十六日

諭禮部

元良關係國本慶喜懋膺

天眷今皇太子出痘荷

天地

祖宗

社稷之祐已經痊愈朕心欣悅應遣官致祭

圜丘

方澤

太廟

社稷行告謝禮爾部作速擇吉來奏特諭康熙十七年

十二月初九日

諭吏部

皇太子出痘痊愈朕心欣悅醫官甄國勳候選知縣傅為格侍奉調理小心勤慎宜行議叙以示加恩爾部議奏特諭康熙十七年十二月二十五日

諭盛京將軍安禔護

今據鎮守寧古塔烏喇將軍巴海寄字與侍衛瓢子對奏云副都統布克韜還自盛京向衆宣言已經遷移盛

京之人出兵不行差遣凡有事故俱照寧古塔例寬至五年始行結案遷移之人皆加級賞賚其時適值將布克韜補授副都統鄂泰員缺移文到彼宣旨畢布克韜復向達布都杜牛諾海祁木訥等言伊得補副都統之故爾等亦應遷移因此達布都杜牛諾海祁木訥等俱各率本佐領於正月初六初十日與從前原欲遷移佐領一同遷移惟副都統查努喀瓦柳杜布達喀阿巴泰巴牛堪屠木柱賈齊哈七佐領竝納達納半佐領仍欲

留彼其先不願遷者今既欣然欲遷望兩侍衛轉奏等語觀此則達布都杜牛諾海祁木訥等所言遷移是實若將伊等於盛京安插則地方窄狹所分田土遙遠必致糜費錢糧爾來京師曾面奏云欲於山海關以外諸城分設駐防協領副都統將舊官兵歸併一處駐札似為有益今詳繹爾言甚當應速行之其地方遠近田土多寡會同彼處大臣詳議具奏特諭康熙十八年正月初五日

諭戶部

江西舊欠錢糧屢經該省總督巡撫及科道等官奏請蠲免朕已洞悉但當逆賊煽亂之時各省地方與賊接壤者被其侵犯迫而從逆情非得已故於平定之後其舊欠錢糧應蠲免者悉行蠲免江西於賊未到之先地方奸徒輒行倡亂廣信南康饒州奉新寧州宜黃安仁永新永豐彭澤湖口瀘溪玉山鉛山等處所在背叛忠義全無紳衿兵民人等或附和嘯聚抗拒官軍或運送

糧米助張賊勢或布散偽劄惑誘良民或窩藏奸細潛
通消息輕負國恩相率從逆以致寇氛益熾兵力多分
遲延平定之期勞師費餉揆厥所由良可痛恨即今田
廬蕩析家室仳離皆其自作之孽逋賦未蠲職此之故
但思逆寇漸經殲除地方凋敝舊欠追比民困愈深朕
心殊為不忍其十六年以前舊欠錢糧著盡行蠲免爾
部即行該督撫通行曉示務使小民均霑實惠以昭朕
愛養百姓至意特諭康熙十八年二月初四日

諭內務府

近聞從前所賜包衣佐領及渾託河人等葬地今已無
餘此等窮寒之人在日辛勤供役沒無葬身之處甚為
可憫著於戶部查交爾衙門田地內酌量撥給特諭康
熙十八年二月初九日

諭吏部

朕以萬幾時暇留心經史思得博學鴻儒備顧問著作
之選故特頒諭旨令內外諸臣各舉所知膺薦人員已

經陸續到部欲行考試因天寒晷短恐其難於屬文弗
獲展厥蘊抱今天氣已漸融和應定期考試所有合行
事宜爾部會同翰林院詳議具奏特諭康熙十八年二
月十七日

諭兵部

我國家開創大業軍法最為嚴明凡擊斬賊衆攻取城
池必據實奏報復行確核功罪昭著故能信賞必罰鼓
勵戎行竝無虛偽冒功之弊今自用兵以來每覽各處

奏捷章疏其中固有實在建功者亦有虛詞妄報者如
擊敗賊兵動稱斬殺甚多或云數千或云萬餘或云不
計其數甚至賊棄空城或云如何攻取如何恢復妄行
謊報微功小寇任意鋪張議叙之時希冀濫邀陞賞殊
非人臣事上勿欺實心為國之誼以後各處領兵大將
軍將軍督撫提鎮等務須洗心滌慮勿蹈前轍凡於報
捷必確核功績據實上聞如因仍陋習冒濫軍功或被
傍人舉首或別經發覺定以軍法從重治罪決不饒恕

爾部即通加嚴飭併曉諭官兵一體遵行特諭康熙十八年三月二十一日

諭禮部

自古帝王敦重倫常篤念勲舊必有褒嘉之典以示推恩孝昭皇后德著椒宮母儀天下懿範如在每切追思其父公遇必隆簪纓世裔宣力累朝忠殫謀猷功存弼亮況篤生賢淑佐理宮闈宜加表揚垂諸永久已勅所司特為建立祠堂其妻縣主夙懋溫恭克昭家訓宜竝

祔享朕親製碑文勒之貞珉告成之日應賜諭祭爾部
詳察典例具奏特諭康熙十八年三月二十四日

諭禮部

時已入夏天氣亢暘農務方興雨澤未降恐麥禾不能
及時長養朕心深為惓切著爾部堂上官一員同順天
府官員竭誠祈禱特諭康熙十八年三月二十六日

諭吏部

薦舉到文學人員已經親試其取中一等彭孫通倪燦

張烈汪霽喬萊王頊齡李因篤秦松齡周清源陳維崧
徐嘉炎陸藻馮勗錢中諧汪楫袁佑朱彝尊湯斌汪琬
邱象隨二等李來泰潘耒沈玠施閏章朱漢震黃與堅
李鎰徐鉉沈筠周慶曾尤侗范必英崔如岳張鴻烈方
象瑛李澄中吳元龍龐塏毛奇齡金甫吳任臣陳鴻績
曹宜溥毛升芳曹禾黎騫高詠龍燮邵吳遠嚴繩孫俱
著纂修明史其現任候補及已仕未仕各員作何分別
授以職銜其餘現任者仍歸原任候補者仍令候補未

仕者俱著回籍內有年老者作何量給職銜以示恩榮
爾部一併詳議具奏告病者不必補試特諭康熙十八
年三月二十九日

諭刑部

今已入夏亢陽不雨耕種愆期民生何賴或內外問刑
衙門有無知而罹法網小過而陷重辟株連無辜淹禁
日久刑獄重地人命攸關審擬未當有干

天和朕心每思及此深用警惕茲特遣索額明珠杜

立德等會同三法司將已結大案見在監禁者逐一詳
加審理務期明允無使冤滯其在外直省監候重犯應
選三法司滿漢賢能司官前往察審凡罪可矜疑者會
同該撫臬司詳開情由具奏俾無枉無縱以祈

天休副朕慎刑愛民至意其應遣司官開列職名具奏
特諭康熙十八年四月初四日

諭禮部

民資粒食以生今時值夏令雨澤未降久旱傷麥秋種

未下農事堪憂皆由朕躬涼德政治未協大小臣工不能廉已愛民勤修職業致干

天和朕用是夙夜靡寧深切警惕實圖修省諸臣亦宜循省過愆恪共乃職期於共襄治理感召休和茲當虔誠齋戒躬詣

天壇親行祈禱為民請命爾部即擇期具儀來奏特諭
康熙十八年四月初十日

諭兵部

湖南廣西等處已經底定滇黔指日蕩平凡在京在外
大小文武官員內有家口陷於賊中者有隻身投誠家
口仍在彼處者有以前抗賊被害而家口尚有遺留者
大兵到日著逐一清察務加保全俾令得所聽其親眷
完聚爾部即通行傳諭各路大將軍將軍督撫提鎮等
遵行特諭康熙十八年四月二十二日

諭兵部

逆賊吳三桂煽亂以來各處大小文武官員克堅臣節

不負朝廷不辱身名者既已加恩旌異以勵忠貞其或
勢窮力竭迫而從賊者朕久已洞悉苟悔罪來歸概行
寬宥惟祖澤清父子受國家恩養甚厚前澤清叛時意
其必被賊迫脅不得已從逆及既降復叛則甘心附賊
可知情罪重大國法難容不許招撫亦不許准其投誠
爾部即密行傳諭各路大將軍督撫提鎮等遵行康熙
十八年四月二十二日

諭戶部

民生以食為天必蓋藏素裕而後水旱無虞自古耕九
餘三重農貴粟所以藏富於民經久不匱洵國家之要
務也比以連年豐稔粒米充盈小民不知蓄積恣其狼
戾故去年山東河南一逢歲歉即以饑饉流移見告雖
議蠲議賑加意撫綏而被災之民生計難遂良由地方
有司各官平日不以民食為重未行申明勸諭之故近
據四方奏報雨澤霑足可望有年恐豐熟之後百姓仍
前不加撙節妄行耗費著各該地方大吏督率有司曉

諭小民務令力田節用多積米糧庶俾俯仰有資凶荒
可備以副朕愛養斯民至意爾部即遵諭行特諭康熙
十八年六月初八日

諭吏部等衙門

自古帝王撫御萬方兢兢業業勤求治理必期陰陽順
序和氣凝庥或遇災異示儆務省愆思過實修人事挽
回

天心茲者本月二十八日巳時地震之變譴告非常反

覆思維深切悚惕蓋由朕躬不德敷治未均用人行政
多未允符內外臣工不能精白乃心恪盡職掌或罔上
行私或貪縱無忌或因循推諉或恣肆虐民是非顛倒
措置乖方大臣不法小臣不廉上干

天和召斯災眚若不洗心滌慮痛除積習無以昭感格
而致嘉祥朕茲力勤政務實圖修省目今應行應革事
宜著部院三品以上官及科道在外各該督撫明白條
奏直言無隱其在京三品以上堂官并督撫提鎮俱著

據實自陳毋得浮泛塞責爾部即遵行仍通行曉諭內
外軍民人等咸使聞知特諭康熙十八年七月二十八
日

諭戶工二部

朕御極以來孜孜求治期於上合

天心下安黎庶夙夜兢惕不敢怠荒乃於本月二十八
日巳時地忽大震變出非常皆因朕躬不德政治未協
大小臣工弗能恪共職業以致陰陽不和災異示儆深

思愆咎悚息靡寧茲當力圖修省以迓

天庥念京城內外軍民房屋多有傾倒無力修葺恐致
失業壓倒人口不能棺殮良可憫惻作何加恩軫恤著
速議具奏仍通行曉諭咸使聞知特諭康熙十八年七
月二十八日

聖祖仁皇帝御製文集卷八

欽定四庫全書會要

聖祖仁皇帝御製文集卷九目錄

勅諭

諭內閣九卿詹事科道滿漢各官

諭大學士明珠李蔚尚書宋德宜左都御史魏

象樞學士佛倫

諭大學士明珠

諭大學士明珠

諭吏部等衙門

諭大學士索額圖明珠戶部尚書伊桑阿

諭吏部等衙門

諭戶部侍郎薩木哈

諭九卿詹事科道

諭大學士索額圖明珠李蔚杜立德馮溥學士

噶爾圖佛倫希福項景襄李天馥

諭九卿科道

諭護軍統領吳丹

諭大學士索額圖明珠李蔚馮溥學士噶爾圖
佛倫項景襄

諭禮部

諭刑部

諭大學士索額圖明珠李蔚杜立德馮溥學士
噶爾圖佛倫項景襄李天馥

諭康親王傑淑

欽定四庫全書薈要卷一萬二千九百九十一

集部

聖祖仁皇帝御製文集卷九

勅諭

諭內閣九卿詹事科道滿漢各官

茲者異常地震爾九卿大臣各官其意若何朕每念及甚為悚惕豈非皆由朕躬料理幾務未當大小臣工所行不公不法科道各官不直行參奏無以仰合天意以致變生耶今朕躬力圖修省務期挽回

天意爾各官亦各宜洗滌肺腸公忠自矢痛改前非存心
愛民為國且爾等自被任用以來家計頗已饒裕乃全無
為國報効之心爾等所善之人即以為善而奏聞爾等所
不合之人即不行奏請此等不公事情朕聞見最確欲即
行處分猶望改過雖知之而不令議罪也今見所行愈加
貪黷習以為常且從前遇此等災變之事朕亦屢曾申飭
但在朕前云欽遵申飭之旨究竟全不奉行前此大奸大
惡之人朕重加處分爾等亦所明知此即勝樣也再科道

各官向來於大奸大惡之人未見糾參或因事體曖昧未
有憑據難於舉發此後科道各官如有確見即行據實參
奏若依然虛飾如前所行奸惡巧為遮蓋不加省改或事
情發覺或經朕訪出雖欲寬免國法具在決不饒恕著即
傳諭齊集諸臣咸令知悉康熙十八年七月二十八日

諭大學士明珠李蔚尚書宋德宜左都御史魏象
樞學士佛倫

地震示警災及軍民朕居高御物勤恤民隱遇茲變異

惻怛彌殷其摧塌房屋壓傷人口惟恐五城御史不能
逐戶細察止憑司坊官員總甲人等開報未盡詳確不
得均霑實惠應分遣不在五城滿漢御史詳加稽察著
都察院遵行康熙十八年七月二十八日

諭大學士明珠

地震傾倒民居朕心憫念至於窮苦兵丁出征在外房
屋毀壞妻子露處無力修葺更堪惻然可勅該部行令
八旗各佐領下官員殷實者共相存恤出貲修助俾貧

困之家早獲寧居該旗都統副都統參領親行詳察毋致遺漏使窮苦之人妻子無棲息之所朕亦時加訪問若有玩忽該旗都統副都統參領佐領驍騎校小撥什庫俱從重治罪康熙十八年七月二十八日

諭大學士明珠

茲因地震五城地方房屋傾頽貧苦小民不能補葺朕心特為軫念兩鄰十家戶有互相存恤之義可協助修理如官紳富民願捐貲為貧民修理房屋者該管官酌

量獎勵其令都察院行五城御史遵行康熙十八年七月二十八日

諭吏部等衙門

朕薄德寡識愆尤實多違此地震大變中夜撫膺自思如臨冰淵兢惕悚惶益加修省仍宣布朕心使爾諸大臣總督巡撫司道有司各官咸共聞知務期洗心滌慮實意為國為民斯於國家有所裨益即爾等亦並受其福庶幾

天和可致若仍虛文掩飾致負朕意詢訪得實決不為
爾等姑容也一民生困苦已極而大臣長吏之家日益
富饒民間情形雖未昭著近因家無衣食將子女入京
賤鬻者不可勝數非其明驗乎此皆地方官吏諂媚上
官苛派百姓總督巡撫司道又轉而餽送在京大臣以
天生有限之物力民間易盡之脂膏盡歸貪吏私橐小
民愁怨之氣上干

天和以致名水旱日食星變地震泉涸之異一大臣朋

比徇私者甚多每遇會推選用時皆舉其平素往來交好之人但云辦事有能並不問其操守清正如此而謂不上干

天和者未之有也一用兵地方諸王將軍大臣於攻城克敵之時不思安民定難以立功名但志在肥己多掠占小民子女或借為通賊每將良民廬舍焚燬子女俘獲財物攘取名雖救民於水火實則陷民於水火之中也如此有不上干

天和者乎一外官於民生疾苦不使上聞朝廷一切為
民詔旨亦不使下達雖遇水旱災荒奏聞部覆或則蠲
免錢糧分數或則給散銀米賑濟皆地方官吏苟且侵
漁捏報虛數以致百姓不霑實惠是使窮民而益窮也
如此有不上干

天和者乎一大小問刑官員將刑獄供招不行連結使
良民久羈囹圄改造口供草率定案証據無憑枉坐人
罪其間又有衙門蠹役恐嚇索詐致一事而破數家之

產如此有不上干

天和者乎一包衣下人及諸王貝勒大臣家人侵占小民生理所在指稱名色以網市利干預詞訟肆行非法有司不敢犯其鋒反行財賄甚且身為奴僕而鮮衣良馬遠勝仕宦之人如此貴賤倒置為害不淺以上數條事雖異而原則同總之大臣廉則總督巡撫有所畏憚不敢枉法以行私總督巡撫清正則屬下官吏操守自潔雖有一二不肖有司亦必改心易慮不致大為民害

此等事朕非不素知但以正在用兵之際每示寬容今上天屢垂警戒敢不昭布朕心嚴行誡飭以勉思共回天意作何立法嚴禁務期盡除積弊著九卿詹事科道會同詳議具奏特諭康熙十八年七月三十日

諭大學士索額圖明珠戶部尚書伊桑阿

官員兵丁房屋牆垣頃因地震塌毀甚多一時不能修葺四品官員以下原有半俸此一次仍行全給其明甲撥什庫披甲當差人役錢糧併原增銀一兩著即支與

兩月令其修理康熙十八年八月初二日

諭吏部等衙門

凡為臣子者同寅協恭自古皆然今各部院辦理事務大小漢官凡事推諉滿官事之得當則歸功於己如事失宜則卸過於人至於入署不待事畢諉於滿官祇圖早歸宴會嬉遊不為國家盡力擔當料理公務自此以後各宜協力同心務盡厥職不可仍前推諉至科道各官平日章奏內將一二可行之事隱附私情希圖作弊

凡有條議鮮非無因閱覽奏疏多以己為至公至廉其
囑託公事肆行妄為外播威勢挾制多端地方督撫等
官莫不畏懼小民困苦未必不由於此作何懲戒著九
卿詹事科道詳議具奏特諭康熙十八年八月十二日
諭戶部侍郎薩木哈

通州三河等處地震災變壓傷人口無人收瘞殊為可
憫戶工二部會同將旗下及民人房屋并各寺廟內有
見被壓埋者作何察明數目其速議具奏康熙十八年

八月十八日

諭九卿詹事科道

自古設立臺省原係朝廷耳目之官上之則匡過陳善
下之則激濁揚清務求知無不言言無不盡乃稱厥職
近見直言讜論者不過幾人徇私好名者不可勝數朕
自臨御以來略知此情每期言路諸臣化其偏私實陳
得失輔登上理頃有以風聞請者試約略論之如今之
章奏已見施行者雖不明言為風聞何嘗不是風聞今

若開風聞之條使言事者果能奉公無私知之既確言之當理即當敷陳何必名為風聞方入告也儻生事之小人恃為可以風聞但知己之好惡必致擅作威福以行其私彼言之者既無確見聽之者安能問其是非故曰無稽之言勿聽弗詢之謀勿庸正所以誠言之無據謀之自專也況天下之大臣民之衆導之以理曉之以法待臣下須寬仁有容不因細事而即黜之所以體羣工也用人則隨才器使無求全責備之心蓋以人材有

不齊也若關天下之重朋黨徇私之情皆國家可參可
言之大事不但科道而已有志之臣民槩可以言之何
在區區風聞之言能斂戢奸貪之志氣哉治國家者在
有治人不患無治法爾康熙十八年八月二十六日

諭大學士索額圖明珠李蔚杜立德馮溥學士噶
爾圖佛倫希福項景襄李天馥

自古帝王治天下之道因革損益期於盡善原無數百
年不弊之法果屬不可行者自應參酌時宜歸於可久

至於制度既定事可遵行不宜議論紛紜朝更夕改近
閱章奏亦有不思事之可否但欲徒為更張或粗識數
字即為大言準之事理殊屬茫昧如逞空言無補實用
誰其不能且明末一切事例游移不定上無道揆下無
法守以致淪亡此皆爾等所親見亦衆所共知今後凡
條奏本章爾大學士等務加詳酌康熙十八年八月二
十七日

諭九卿科道

今將科道兩衙門本章情弊無益國計民生之處一一講究卿等必有至公之衆論以佐朕意卿等但有所見即直言不可隱諱自古設立科道原係朝廷耳目之官務求知無不言言無不盡方稱其職今每見直言讜論者不過幾人徇私好名者不可勝數即如科道條陳一事部議妥確奉旨准行又有科道官言其不可者今日之所謂是明日又轉而為非朝更夕改部院至於督撫有司不知今日之事或行二三日而即更或行數月而

即更茫無成憲難取信於天下豈治道至理哉舉其大槩如舉才能一事是因人材不一有能理繁者有有操守者有練習其事者自古選賢任能治之大道與論俸不同其法未嘗不善即

世祖皇帝時亦曾有諭常行選擇之條偶徇私作弊之人將不肖寡廉者薦之因一人而其法遂壞自朕親政以來如鹽差關差數行更換以後條陳不知又改幾次也又如戶部銷算錢糧一事因督撫所

報不合時價故部議駁回而科道輒有言者以為督撫地方大臣斷無虛估價值肥已行私凡有銷算皆不應駁查及部議徑准督撫之銷算不行再駁則科道又以督撫冒破錢糧一束草原價若干開銷若干一石豆原價若干開銷若干不特草豆為然凡馬匹等項事事皆有虛冒部中不行詳查槩聽督撫開銷以徇情面由此觀之部議不行駁回則以為徇督撫之私情駁回則以為督撫地方大臣不宜疑其有所虛冒又恐衙役往來

騷擾生事或應駁或應不駁何者為是兩說俱無定論
是皆大者餘悉難述康熙十八年八月二十九日

諭護軍統領吳丹

近者廣西南寧賊將軍吳世琮被誅湖南武岡州吳國
柱亦已授首廣西湖南俱經投誠賊意懈弛賊兵潰散
天下之人咸知賊勢必敗罔不引領望諸將軍早清逆
氛爾等陝西將士駐馬無傷斃人無疾病之地不思速
滅賊寇支吾推諉進取無期又有何人代為爾等破賊

耶爾在朕左右稔知朕意應勇果任事參贊大將軍機
宜以立功勲頃大將軍稱言來京陛見面奏軍國大事
比至陳奏並無成算有失衆望此固軍前將士所悉知
也若失此機會可乘之時萬一賊據四川貴州雲南以
為巢穴致歲月相持彼時悔無及矣宜速行籌畫特諭
康熙十八年九月初九日

諭大學士索額圖明珠李蔚馮溥學士噶爾圖佛
倫項景襄

今聞錢法漸弛鼓鑄收銅等項滋生弊端以致制錢日少價值騰貴著戶工二部都察院堂官同詣錢局親察每鑄錢一文必重一錢應作何釐剔弊端俾制錢充裕永可遵行著徹底確察逐一定議具奏至於部院衙門各處所有廢銅器皿毀壞銅鐘及廢紅衣大小銅砲并直隸各省所存廢紅衣大小銅砲著盡行確察解部鼓鑄康熙十八年九月十三日

諭禮部

前以地震示警朕恐懼修省夙夜靡寧已經遣官虔告郊壇乃精誠未達迄今時復震動未已朕心益用悚惕茲當虔誠齋戒躬詣

天壇親行祈禱爾部即擇期具儀來奏特諭康熙十八年九月十三日

諭刑部

國家設立法制原以禁暴止奸安全良善故律例繁簡因時制宜總期合於古帝王欽恤民命之意向因人心

滋偽輕視法網及強暴之徒凌虐小民故於定律之外復嚴設條例俾其畏而知警免罹刑辟乃近來犯法者多而奸宄未見衰止人命關係重大朕心深用惻然其定律之外所有條例如罪不至死而新例議死或情罪原輕而新例過嚴者應去應存著九卿詹事科道會同詳加酌定確議具奏特諭康熙十八年九月十四日

諭大學士索額圖明珠李蔚杜立德馮溥學士噶爾圖佛倫項景襄李天馥

地震以來修葺破壞工費甚多時值用兵軍需孔亟度
支浩繁各處工役或有遲延浮冒侵蝕等弊除



奉先殿皇太子宫并總管內務府監造工程外其各處
修造著都察院逐一詳察康熙十八年十月十五日

諭康親王傑淑


自數年用兵以來所費錢糧不貲以致民力疲困今大
破湖南賊寇餘孽遁入雲貴扼據險要抵死支持其勢
旦夕殄滅惟福建海賊竊踞海澄倚金門廈門為營窟

騎兵無所用其力惟藉水師樓櫓攻取甚屬緊要王等
曾言今歲賀蘭國船隻若到於八月內進攻海寇儻賀
蘭國船隻愆期當內徙邊海人民堅壁清野以待其困
今歲因賀蘭國之船未至故前議不行近者福建綠旗
兵丁較取廈門金門時漸增數倍即無滿兵止以綠旗
兵丁剿滅賊寇未為不足現在福建滿兵甚多應即掣
一半以省糧餉以甦民力但耿精忠尚在閩中虞有意
外之變故暫為停止朕思即令精忠來京此輩惶恐疑

畏或生他故如留精忠在彼王親率滿兵一半回京似屬不可設必候諸處底定則福建需用糧餉較之他省不啻什百為今之計王當開諭耿精忠令其陳奏請安

 聖
 陛見儻精忠因王之言具疏止可令其自來若精忠能即行王獨率滿兵一半先回則勢更有所不可也此事關係甚為重大王當詳細籌畫具奏特諭康熙十八年十月二十三日

聖祖仁皇帝御製文集卷九



總校官庶吉士臣侍朝

校對官檢討臣王福清

校對官庶吉士臣陳墉

謄錄監生臣單勉中

謄錄監生臣浦燭

欽定四庫全書薈要

集部

聖祖仁皇帝御製文集卷

十二

詳校官原任編修臣徐立綱

欽定四庫全書薈要

聖祖仁皇帝御製文集卷十目錄

勅諭

諭戶部

諭禮部

諭九卿詹事科道

諭康親王傑淑

諭大將軍安親王岳樂



諭九卿

諭大學士索額圖明珠李蔚杜立德馮溥

諭戶部

諭戶部尚書伊桑阿

諭大學士索額圖勒德洪明珠李蔚杜立德馮

溥學士噶爾圖希福徐元文李天馥

諭大學士索額圖

諭刑部

諭吏兵二部

諭吏部

諭禮部

諭吏部等衙門

諭大學士勒德洪明珠李蔚杜立德

諭內閣九卿詹事科道

諭恪純長公主

諭大學士索額圖勒德洪明珠李蔚杜立德學

士噶爾圖希福李天馥

欽定四庫全書蒼要卷一萬二千九百九十二集部

聖祖仁皇帝御製文集卷十

勅諭

諭戶部

前者大兵進剿四川已破朝天等關直至保寧恢復在邇
因周有德張德地席普臣駐劄廣元不將糧餉極力轉送
軍前陝西總督巡撫亦不將糧餉極力運送以致大兵糧
餉不繼難於久駐遂爾退回貽誤軍機關係重大此數年

以來使逆賊逋誅封疆未復兵民苦累休養無期皆周有德張德地席普臣陝西總督巡撫怠玩遲延之故每念及此深可痛恨目今大兵分路進取已經恢復漢中府不日前抵蜀疆相機剿撫底定可期軍前糧餉最為緊要著陝西總督巡撫大小文官殫心料理設法運送務令兵食無匱士馬飽騰早奏捷功以副朕定亂安民至意如該督撫等官漫不經心泄泄從事致糧餉缺乏有誤軍機將督撫以下誤餉之官俱以軍法從事決不饒恕爾等即速為傳

諭遵行特諭康熙十八年十一月初十日

諭禮部

本月初三日太和殿災變出非常朕心深切警惕茲欲
詔告天下爾部即擇期具儀以聞特諭康熙十八年十
二月初五日

諭九卿詹事科道

君臣誼均一體分勢雖懸而情意不隔安危欣戚無不
可相告語者堂陛之義固宜如是也邇者朕體初平忽

遇殿廷不戒被燬於火爾諸臣因朕偶恙復睹此災愛
主心切必謂朕當過於憂慮朕披閱經史頗明大道朕
之一身上受

祖宗之付託下繫臣民之瞻仰為任匪輕寧不自愛惟
是今秋有地震之變又各處饑饉洊臻寇盜未息此朕
早作夜思中心惶懼寢食靡寧者至於殿廷告災乃

上天致警敢不夙夜祗畏循省厥愆然其所關止屬朕
躬臨御之所但得海宇清宴置斯民於衽席之上則朕

今所居較諸前代茅茨土階尚或過矣豈至以露處為慮哉朕自五齡即知讀書八齡踐阼統蒞萬方

太皇太后嘗問朕何欲朕敬對曰臣無他欲惟願天下乂安生民樂業共享太平之福而已當時左右實共聞之自茲迄今謹持此心兢兢業業恒如一日可以質諸寤寐儻有政治失宜皆朕躬之咎從不諉過臣下惓惓之意茲與爾等悉之特諭康熙十八年十二月初六日

諭康親王傑淑

王所奏據實指叅事已經覽悉朕思凡行一事必前後
計慮果有裨於國家始可舉行若輕率妄動必致舛錯
今廣西湖南漢中興安等處俱已底定逆賊餘黨引領
以冀歸正者不止百千若將耿精忠即行正法不但已
經投誠之人以為後日亦必如此聲明其罪即未經投
誠之人覩此寒心亦未可知關係實重前朕手諭欲令
耿精忠來京者蓋掣回福建一半滿兵之意非使即行
處決俾王先來也如王善能勸諭令至京師諸事皆得

平妥王但當加意開導之不可輕舉彼如必不赴京再行詳悉密奏候旨特諭康熙十九年正月初六日

諭大將軍安親王岳樂

褒德賞功國家之令典安內攘外社稷之崇勲王連年以來遠蒞巖疆親經百戰擲風沐雨歷暑逾寒競揚貔武之雄克清梟獍之孽湖湘諸處已見蕩平滇黔餘氛俱成坐困更體朕軫念窮荒之心廣示招徠深加撫恤王師所至遐邇來歸捷奏屢宣中外稱慶朕既嘉碩畫

益篤親爰命班師副朕懷想頃者聞王已抵武昌奏
凱可期特遣使臣慰勞兼賜駱駝良馬以示優眷王其
按程而來朕將計日以待特諭康熙十九年正月二十
一日

諭九卿

科道官內陞外轉原以示勸懲也今見才優者猶知憚
於外轉其或才力不及不稱言職之人安於外轉道員
者甚多是但以示勸非所以示懲也故令九卿詹事科

道會議務期得當魏象樞等奏稱恐天下不肖之輩不識朝廷慎重道員之意疑為厭薄言路之端等語邇年以來姚文然李之芳施維翰等內陞未久即任以大僚督撫亦因其克盡言職才能素著之故也此無論天下智愚不肖當亦知朝廷無厭薄言路之意矣其外轉者或係素無建白或係昧於事理或係任臆妄言或係才力不及原非因其條奏而外轉也又稱近年外轉之科道竝無貪污溺職之一人而五部郎中俸深陞道如范

永茂高恒豫盧元培程汝璞等賊私累累劣蹟彰彰者
不知凡幾等語科道外轉者豈竝無溺職之一人乎五
部俸深陞道員者甚多豈盡係貪劣之人乎如陳丹赤
等優者匿而不言獨舉范永茂等四人不辨賢否而槩
言之可乎魏象樞去歲七月內曾於朕前面奏科道官
所行皆係徇私有負朝廷耳目之任罪皆應死今甫數
月復言歷年外轉者竝無溺職之一人前後參差何其
速耶爾等所奏理不宜批答因註語內有以存國體之

語故令諸臣知之至若外轉科道以小品官員用遂至有傷國體朕殊不解故特諭諸臣示以朕意康熙十九年正月二十一日

諭大學士索額圖明珠李蔚杜立德馮溥

雲南貴州係邊疆重地苗民雜處總督關係最為緊要必得才謀超衆之人方克勝任將軍趙良棟勇略甚著操守清廉雖係武弁通達文義著改授雲貴總督仍兼將軍必能蕩平地方撫輯兵民著議政王大臣九卿詹

事科道官員會議具奏康熙十九年正月二十九日

諭戶部

前因各省地方多有饑饉已經遣官賑濟今見京師附近之地四方饑民流移在道朕心深為憫惻若不急行安插令其得所將來必至鬻賣子女難以生全作何設法令其各歸原籍著該地方官加意撫綏安集復業以免流離著九卿詹事科道詳議具奏特諭康熙十九年二月初七日

諭戶部尚書伊桑阿

朕聞宣府等處歲值大侵吾民乏食鬻賣妻子以自求
活夫人孰不愛其室家哉至欲延一朝夕之命割其所
親憫惻莫甚焉其遣爾部郎中明格禮馳驛速往會同
地方官賑濟急拯艱厄以紓朕懷康熙十九年二月二
十六日

諭大學士索額圖勒德洪明珠李蔚杜立德馮溥
學士噶爾圖希福徐元文李天馥

頃者年復不登饑民就食多聚京師故令增設各廠煮糜救饑今四方失業之民聞而來者愈衆反致流離道路有轉徙溝壑之虞且天氣漸向炎熱老幼羸弱聚之蒸為疾疫轉益災沴朕甚憂焉作何設法令其各歸原籍不致失所仍令各該地方官拊循周恤毋致流移饑民內有疾疫死亡者令五城作何給以藥餌醫治拯救去歲三冬無雪今春無雨刑獄淹禁恐有冤抑應即行清理乞食饑民向不許入裏城今應聽其出入用兵地

方殉難諸臣卹典原候事平定議今應即與舉行陰陽不和盖由人事失當思欲感通未得其方以上數事皆朕意念所及爾等會同尚書侍郎左都御史副都御史詳議具奏爾等國之大臣所宜極慮深思以答委任應行應革關切時務者其各抒所見一併議聞康熙十九年四月初一日

諭大學士索額圖

五城賑濟饑民可各將姓名籍貫問明造冊交與總理

賑濟僉都御史高爾位彙送戶部康熙十九年四月初

一日

諭刑部

去歲三冬無雪今春雨澤愆期天氣亢暘農事可慮朕
念切民瘼夙夜焦勞或因刑獄淹禁中有冤枉致干

天和亦未可知茲特遣明珠杜立德希福李天馥等會
同三法司將已結重案逐一詳加審鞫如有罪可矜疑
者即與察明事由開列具奏務期情法允協有枉必伸

以副朕欽恤獄讞至意特諭康熙十九年四月初二日
諭吏兵二部

自吳逆叛亂以來各用兵地方文武官員有矢志忠貞
克篤臣誼抗賊不屈捐軀殉難者幽忠難泯大節可風
彼時即宜錫以卹典但以各處尚未蕩平其中有情節
未確者有應行察者有正在招撫未便遽行者不得已
而緩至今日朕每念及深為惻然茲各路會剿大勢底
定餘氛指日殲滅其殉難各官應加褒卹以慰忠魂爾

等即詳察議奏特諭康熙十九年四月初三日

諭吏部

朕萬幾之暇留心經史雖遜志時敏夙夜孜孜而研究
闡發良資講幄之功日講起居注各官俱以學行優長
簡備顧問講解明晰奉職勤勞所纂講義典確精詳深
裨治理侍讀學士張英供奉內廷日侍左右恪恭匪懈
勤慎可嘉高士奇杜訥學問淹通居職勤慎供奉有年
應授為翰林官爾部俱一併從優議叙具奏以後著益

殫心職業佐助典學以副朕崇儒重道稽古右文至意
特諭康熙十九年四月初八日

諭禮部

農務為國家之本粒食乃兆姓所資必雨暘時若而後
秋成可期自去冬以來雨雪未降今時已入夏甘霖尚
稽久旱傷麥秋種未布農事深為可虞且失業之民饑
饉流移尤堪憫惻或因政治未協致干

天和朕用是夙夜靡寧循省儆惕茲當虔誠齋戒躬詣

天壇親行祈禱為民請命爾部即擇吉具儀來奏特諭
康熙十九年四月十一日

諭吏部等衙門

致治安民之道首在懲戒貪蠹嚴禁科派而後積弊可
清閭閻不擾近見街道衙門蠹役詐索害民又聞提督
步兵衙門五城司坊街道巡捕營等衙門各官不能潔
已奉公恪遵法紀縱容衙役朘削小民或沿習陋規科
歛行戶或借端挾詐官役分肥肆意橫行無辜受害種

種弊端深可痛恨向來雖經嚴禁定有處分之例但恐小民未能悉知仍被奸徒擾害應再加嚴飭務令家喻戶曉以副朕安全生民至意著各該衙門通行曉諭遵行特諭康熙十九年五月初二日

諭大學士勒德洪明珠李蔚杜立德

向以亢陽齋居虔禱雖雨澤薄降四野田疇尚未霑足今茲不雨為時又久旱魃為災朕甚懼焉意者政事之失宜者多歟不然天心仁愛下民何其宜雨而久不雨

也日者以政理之故勤求言矣而言者文繁無益其集
九卿詹事科道掌印不掌印各官問今有何事當行何
事當革惡意以陳母有所隱康熙十九年五月十五日
諭內閣九卿詹事科道

朝廷致治惟在端本澄源臣子服官首宜奉公杜弊大
臣為小臣之表率京官乃外吏之觀型大法則小廉源
清則流潔此從來不易之理如大臣果能精白乃心恪
遵法紀勤修職業公爾忘私小臣自有所顧畏不敢妄

行在外督撫各官自應慎守功令潔已愛民乃大臣等
每自謂清正無私粉飾空言至其所行往往營私作弊
有玷官方深負委任之意科道係耳目之官凡有弊端
自當據實參奏且居處甚近如此情弊豈無見聞乃瞻
徇情面緘默不言即有條奏多係繁文言官職掌殊為
未盡如肯從公糾舉孰敢恣行無忌朕以為目今之弊
莫大於此近因天氣亢旱朕夙夜焦思念慮所及無不
舉行感格之道猶恐未盡故特召爾等各面陳所見因

宣諭朕意令爾等知之康熙十九年五月十五日

諭恪純長公主

公主被反叛所累屢年困頓朕每念及未嘗不為惻然
不意深染時症遣乳媪暨親近侍衛往視及回轉奏公
主之語不勝感歎又聞病勢危篤即命該部院衙門將
服飾執事等項星夜製辦今公主體中大愈將此各項
盡送公主處以示朕惓惓注念之意但慮製辦期迫不
甚佳耳康熙十九年六月初七日

諭大學士索額圖勒德洪明珠李蔚杜立德學士
噶爾圖希福李天馥

凡試職官員一年果係稱職者方准實授其未能稱職
者或仍令再試或作何另用著吏部定例議奏康熙十
九年六月二十日

聖祖仁皇帝御製文集卷十